



SAKSFRAMLEGG

Saksnr:	Utval:	Dato
	Kommunestyret	

Sakshandsamar:	Arkiv:	ArkivsakID
Solrun Hauglum	FA-G19	23/803

SAMARBEIDSAVTALE DEMENSVENLEG SAMFUNN

Vedlagte saksdokument:

Samarbeidsavtale Vaksdal
Demensvennlig samfunn Vaksdal

Kommunedirektøren sitt framlegg til vedtak:

Vaksdal kommune vedtek samarbeidsavtale med Nasjonalforeningen for folkehelsen om Demensvenleg samfunn.

Saksopplysningar:

Nasjonalforeningen for folkehelsen har demens som eit av sine satsingsområde og tilbyr kommunar og servicenæringar å inngå i satsinga Demensvenleg samfunn. Demensvenleg samfunn og plikter som følgjer med avtaleinngåing vart orientert om for Kommunestyret på møte 9. mai, og avtale er sendt Vaksdal kommune for signering.

Bakgrunn for saka

Over 100.000 i Noreg har demens, og talet er aukande. I 2030 vil det vera 140.000 personar med demens i landet, og i 2040 vil talet auka til 193.000 (demenskartet.no).

Vaksdal kommune har mange eldre innbyggjarar og derfor også prosentvis mange personar med demens. I 2020 var det i følge statistikkar 123 personar i Vaksdal kommune med demens. Dette utgjer 3,09 % av innbyggjarane. Til samanlikning er snittet i norske kommunar 1,88 %. I 2030 vil talet auka til 128 personar, noko som utgjer 3,36 % av innbyggjarane. Då vil snittet for landet vera 2,48 %. I 2040 vil det vera 164 personar med demens i kommunen, eit snitt på 4,32 %. Snittet for landet er då 3,30 %. Tala er henta frå www.demenskartet.no

Nasjonalforeningen si satsing Demensvenleg samfunn skal bidra til eit betre samfunn for personar med demens der dei vert meir inkluderte og meistrar livet betre, og over 170 norske kommunar samt fleire servicenæringar deltek i arbeidet for eit meir demensvenleg samfunn.

Formelt grunnlag

Meld St. 15 (2017-2018) «Leve hele livet – en kvalitetsreform for eldre»

Demensplan 2025 (2021-2025) Helse- og omsorgsdep.

Kommunedelplan helse og omsorg 2015-2030 Vaksdal kommune «Aktivitet, deltaking og meistring heile livet»

Plan for Leve heile livet reforma i Vaksdal kommune 2021-2024
Handlingsprogram/økonomiplan og Årsbudsjett for Vaksdal kommune

Vurdering og konsekvensar

Gjennom avtalen vil Vaksdal kommune og Nasjonalforeningen for folkehelsen inngå eit langsiktig og forpliktande samarbeid om å skapa eit meir demensvenleg samfunn. Avtalen skal leggja til rette for at Vaksdal kommune skal arbeida for å bli meir demensvenleg slik at personar med demens skal meistra livet betre og kunne delta i kvardagsaktivitetar som til dømes å handla i butikken.

Nasjonalforeningen forpliktar seg til å:

- Sørja for at det vert utarbeida og produsert relevant undervisningsmateriell, og at dette vert distribuert til kommunen.
- Bidra med materiell og innspel til mediestrategien for eit meir demensvenleg samfunn.
- Hjelpa kommunen med profileringsmateriell, kommunikasjonstiltak og mobilisering i arbeidet med å skapa eit demensvenleg samfunn.
- Bidra med kunnskap og informasjon om demens, om korleis ein kommuniserar med personar med demens, og om korleis ulike yrkesgrupper og andre kan bidra.

Vaksdal kommune forpliktar seg til å:

- Planleggja og gjennomføra kurs i demensvenleg samfunn for relevante næringar, organisasjonar, samarbeidspartar og yrkesgrupper.
- Bidra til at personar med demens kan kjenna seg inkluderte og involverte i lokalmiljøet og har høve til å delta i naudsynte kvardagsaktivitetar.
- Etablere ei arbeidsgruppe som skal ha ansvaret for å utarbeida lokale planar for opplæring.

Demens er ein sjukdom som vil påverka liva til mange av innbyggjarane i kommunen, både dei som får diagnosa og dei som er pårørande. Mange av brukarane av helse- og omsorgstenester har denne diagnosa, og lokalmiljø og næringsliv samhandlar og kommuniserar med personar som har demensdiagnose. Det er derfor behov for meir opplysning og informasjon om sjukdommen, om kva plager som er vanlege å få i eit demensforløp, og om korleis ein kan tilretteleggja for og kommunisera med personar med demens. Og det er behov for eit betre tilrettelagt samfunn for denne store gruppa innbyggjarar.

Arbeidet med å gjera kommunen meir demensvenleg vil involvera alle tenesteområda i kommunen samt frivilligheit, næringsliv og brukar-/innbyggjarrepresentantar. Å inngå avtale om Demensvenleg samfunn kan bidra positivt til dette arbeidet.

Kommunedirektør rår til at avtalen vert godkjent slik han ligg føre.